



XXIV Savjetovanje iz krivičnopravne oblasti u Neumu, 03.-06.06.2026. godine

U organizaciji Udruženja sudija/sudaca u Federaciji Bosne i Hercegovine, Centra za edukaciju sudija i tužilaca Federacije Bosne i Hercegovine, Centra za edukaciju sudija i javnih tužilaca Republike Srpske, Ministarstva pravde Bosne i Hercegovine te brojnih pravosudnih institucija i strukovnih organizacija iz Bosne i Hercegovine, u periodu od 3. do 6. juna 2026. godine u Neumu će biti održano XXIV Savjetovanje iz krivičnopravne oblasti pod nazivom "Savremeni izazovi krivičnog pravosuđa u Bosni i Hercegovini".

Tradicionalno savjetovanje koje se održava u hotelu "Zenit" u Neumu, i ove godine će okupiti sudije, tužitelje, advokate, predstavnike akademske zajednice, kao i druge stručnjake iz oblasti krivičnog prava i pravosuđa iz Bosne i Hercegovine i regije.

Prema najavljenom programu, fokus ovogodišnjeg savjetovanja bit će usmjeren na suvremene izazove krivičnog pravosuđa, uključujući pitanja finansijskog kriminala, organiziranog kriminala i korupcije, oduzimanja imovinske koristi pribavljene krivičnim djelom, digitalnog nasilja, digitalnih dokaza i primjene umjetne inteligencije u krivično-pravnom sistemu, kao i pitanja zaštite izbornih prava građana i okoliša kroz krivičnopravne mehanizme.

Tokom višednevnog programa planirana su plenarna izlaganja, panel diskusije i stručne radionice koje će omogućiti razmjenu iskustava i unapređenje suradnje između nositelja pravosudnih funkcija i drugih učesnika u sistemu krivičnog pravosuđa.

Savjetovanje iz krivičnopravne oblasti u Neumu već više od dvije decenije predstavlja jedan od najznačajnijih stručnih skupova iz oblasti krivičnog prava u Bosni i Hercegovini, s ciljem kontinuiranog stručnog usavršavanja i jačanja kapaciteta pravosudnih institucija za odgovor na suvremene oblike kriminaliteta.